



SIARAN AKHBAR

MAJLIS PENANDATANGANAN *PARTICIPANT SERVICE AGREEMENT* DI ANTARA AUTORITI MONETARI BRUNEI DARUSSALAM DAN JABATAN KEMAJUAN PERUMAHAN, KEMENTERIAN PEMBANGUNAN

BANDAR SERI BEGAWAN, NEGARA BRUNEI DARUSSALAM

1. Autoriti Monetari Brunei Darussalam (AMBD) baru-baru ini telah menandatangani *Participant Service Agreement* dengan Jabatan Kemajuan Perumahan, Kementerian Pembangunan (JKP). JKP adalah sebuah jabatan di bawah Kementerian Pembangunan yang bertanggungjawab dalam menyediakan dan membuat penilaian serta pemilihan rumah-rumah bagi pemohon-pemohon yang berkelayakan di bawah Skim Rancangan Perumahan Negara (RPN) Negara Brunei Darussalam. Majlis Penandatanganan tersebut telah diadakan di Ibu Pejabat Kementerian Pembangunan, Berakas, Negara Brunei Darussalam.
2. Menandatangani bagi pihak JKP ialah Yang Mulia Awang Haji Muhammad Lutfi bin Abdullah, Setiausaha Tetap (Pentadbiran & Kewangan) Kementerian Pembangunan dan disaksikan oleh Yang Mulia Awang Haji Mohd Zakaria bin Haji Sarudin, Pegawai Tugas-Tugas Khas Kanan, Kementerian Pembangunan. Manakala menandatangani bagi pihak AMBD ialah Yang Mulia Awang Yusof bin Haji Abd Rahman, Pengarah Urusan AMBD dan disaksikan oleh Yang Mulia Awang Mohammed Roaizan bin Haji Johari, Penolong Pengarah Eksekutif (Biro Kredit).
3. *Participant Service Agreement* ini membolehkan JKP untuk berkongsi maklumat kredit penerima-penerima RPN di bawah bidangkuasa JKP kepada Biro Kredit, AMBD. Perjanjian ini juga membenarkan pihak JKP untuk mendapatkan laporan kredit yang disediakan oleh Biro Kredit, untuk membantu pihak JKP dalam membuat penilaian *creditworthiness* atau kebolehpercayaan kredit pemohon-pemohon RPN. Matlamat utama bagi kerjasama ini adalah untuk membantu pihak JKP untuk membuat penilaian yang lebih baik dalam menentukan kesesuaian jenis skim perumahan dengan mengambil kira keupayaan dalam membuat pembayaran balik serta dalam memenuhi komitmen kewangan pemohon-pemohon RPN. Dengan cara ini, ianya akan dapat memastikan penerima-penerima perumahan tersebut tidak dibebani dengan komitmen kewangan yang terlalu tinggi dalam jangka masa yang panjang.
4. Inisiatif kerjasama ini adalah selaras dengan perancangan pembangunan strategik Biro Kredit dalam memperluaskan liputan maklumat kredit selain daripada maklumat kredit yang biasa diperolehi daripada bank-bank dan syarikat-syarikat kewangan. Objektif pengumpulan data-data nilai tambah sepertimana yang diperolehi daripada pihak JKP ialah sebagai maklumat tambahan kepada maklumat perbankan yang sedia yang mana ianya akan dapat memberikan gambaran yang lebih holistik tentang kedudukan kredit seseorang individu dan seterusnya meningkatkan lagi pengurusan risiko kredit institusi-institutasi kewangan.
5. Biro Kredit di AMBD mengumpul, menyatukan maklumat-maklumat kredit yang disediakan oleh pembekal-pembekal maklumat. Maklumat-maklumat ini disatukan dalam bentuk laporan kredit yang mana digunakan bagi tujuan penilaian kepercayaan kredit. Pada masa ini, pembekal-pembekal maklumat Biro Kredit adalah

terdiri daripada kesemua bank-bank, syarikat-syarikat kewangan dan tabung amanah islam yang berlesen serta pembekal-pembekal perkhidmatan telekomunikasi dan utiliti di Negara Brunei Darussalam, iaitu DST Communication Sendirian Berhad, Telekom Brunei Berhad (TelBru), Progresif Cellular Sendirian Berhad, dan Jabatan Perkhidmatan Elektrik.

6. Untuk maklumat lanjut mengenai Biro Kredit AMBD, sila layari <http://www.ambd.gov.bn/birokredit> , atau melalui emel birokredit@ambd.gov.bn.

Autoriti Monetari Brunei Darussalam

Date: 17 Zulhijjah 1438 / 8 September 2017

Reference: AMBD/COMMS/3